

– Վաճառականի գործը ի՞նչ կը լինի. բամբակի բեռներ ունեի Բաղէշ ճանապարհի դնելու. եկայ, յանձնեցի քարաւանին: – Դուք Բաղէշ կը հանդիպե՞ք, պարոն բժշկապետ:

– Անպատճառ:

– Իսկ Մո՞ւշ:

– Նոյնպէս:

– Ուրեմն, եթէ չէք մերժի իմ փոքրիկ ծառայութիւնը, ես կը տամ ձեզ երկու յանձնարարական նամակներ, մէկը Բաղէշ, միւսը Մուշ, այդ քաղաքներում ես երկու լաւ բարեկամներ ունեմ, նրանք կարող են պիտանի լինել ձեզ: Դուք, կարծեմ, հետաքրքրու՞մ էք հնութիւններով, պարոն բժշկապետ:

– Այո՛, շնորհակալ եմ, խօջայ Թորոս, – ասաց Աւլանը, ընդունելով նամակները եւ սեղմելով մուտուցու ձեռքը: – Մնաք բարեաւ, խօջայ Թորոս:

– Յաջողութիւն եւ բարի ճանապարհ, պարոն բժշկապետ, – ասաց նա եւ պինդ սեղմեց Աւլանի ձեռքը:

Մենք բաժանուեցանք: Ընթերցող, դու խօ չես մոռացել, թէ ով էր այդ մուտուցին իր արաբական ապարօշով եւ իր շիլ վառվռուն աչքերով...

Քարաւան, – դա արեւելքի շարժական կեանքն է. քարաւան տեսնելով, կարելի է արեւելքի կենդանի, գործունեայ եւ եռանդոտ մասը տեսած լինել:

Նեղ ու անձուկ ճանապարհի երկարութեամբ բռնել էր նա մի քանի փարսախ տարածութիւն: Մինը միւսի ետեւից շարժած էին բեռնակիր գրաստները: Այդ երկար, կենդանի շղթան, որի ծայրը չէր երեւում, դանդաղ կերպով շարժւում էր, առաջ էր ընթանում եւ, ճանապարհի խոտորնակի ուղղութեամբ, օձի նման պտոյտներ էր գործում, գալարւում էր եւ դարձեալ ուղիղ ընթացք էր ստանում, երբ ճանապարհը փոքր-ինչ հարթ էր եւ ուղղաձիգ: Բեռնակիր գրաստները բաղկացած էին ջորիներից: Նրանք ղաթար-ղաթար, այսինքն խումբ-խումբ, դասաւորուած էին միմեանց ետեւից: Իւրաքանչիւր խումբը բաղկացած էր տասն ջորիից, բոլորը միագոյն: Մի խումբը սպիտակներ էին, միւսը՝ սևեր, երրորդը՝ մուգ մոխրագոյն եւ այլն: Բոլորից առաջ գնում էր սպիտակների խումբը: Իւրաքանչիւր խումբ կազմում էր մի միութիւն: Մէկ ջորին կապած էր միւսի համետի ետեւից երասանակի շղթայով: Ամեն մի խումբի հետ գնում էին երկու ծառաներ, որ եթէ բեռները ծռուելու լինեն, ուղղեն, կամ եթէ անասուններից մէկը սայթաքելու եւ ընկնելու լինի, կանգնեցնեն: Բոլոր ջորիների զլուխը, պարանոցը եւ գաւակը զարդարած էին գոյնզգոյն հուլունքներով, գոյնզգոյն խխունջներով, գոյնզգոյն փն-